

KIKO TA E MALESA ZIKA?

Zika ta un infekshon kousá dor di e vírùs ZIKA. E vírùs di Zika ta plama via piká di e sangura *Aedes aegypti*. Pues, e mesun sangura ku ta transmití e.o. Dengue i Chikungunya ta transmití Zika tambe. Ademas di haña e infekshon via sangura, sientífikonan a determiná ku por haña Zika tambe via di sèks.

SÍNTOMANAN

Despues di 3 pa 12 dia ku e vírùs ta den bo kurpa bo por haña síntomanan manera:

- keintura;
- iritashon di kueru (rash/uitslag);
- wowítis òf wowo hopi kòrá;
- doló di kabes, di kurpa i di skarnir;
- kurpa debil;
- pia hinchá.

Síntomanan ménos frekuente ta doló patras di wowo (manera Dengue), pèrdida di apetit, sakamentu, diarea i doló di barika.

E síntomanan por dura entre 2 i 7 dia.

Konforme informashon aktual Zika no ta un infekshon fatal, i Zika ta duna síntoma ménos fuerte ku Dengue i Chikungunya.

No tin tratamentu pa Zika, ni vakuna pa prevení Zika.



Si bo sinti síntomanan paresido na esnan menshoná, akudí serka bo dòkter di kas. Dòkter por duna remedi pa aliviá e síntomanan manera keintura i doló.

Na momentu ku dòkter haña ku un pashènt tin síntomanan ku parse Zika e lo tuma e pasonan nesesario pa laga determiná ku enbèrdat ta trata di Zika.

OTRO KONSEKUENSHANAN DI ZIKA

PARÁLISIS. Ounke mayoria kaso di infekshon ku Zika ta duna síntomanan hopi suave, informashon di e epidemianan den pasado i aktual ta indiká ku Zika ta relashoná ku un oumento di kasonan di Guillain-Barré Syndrome (GBS). GBS ta un sorto di parálisis ku por aparesé despues di kualke infekshon (ku vírùs òf bakteria). GBS por dura un periodo kòrtiku òf largu, e persona por rekuperá kompletamente òf parsialmente, tin biaha GBS por kousa morto.

GBS no ta un kos nobo pa Kòrsou. Datonan di e epidemia di Zika na otro parti di mundu ta indiká ku Zika por duna un oumento di GBS,

lokual ta hasi nos pensa ku nos por fèrwagt mas tantu kaso GBS.

EMBARASO. Informashon di e epidemia na Brasil ta indiká ku infekshon di Zika durante embaraso ta relashoná ku pèrdida di e barika, morto di e yu resien nasé òf yuchinan ku ta nase ku un kondishon yamá microcefalia. Microcefalia ta un kondishon kaminda e yu ta nase ku un kabes mas chikitu ku ta normal. E kondishon aki ta relashoná ku problema di desaroyo mental i por kondusí na morto.



PREVENSHON

Komo ku ta via di piká di sangura por haña Zika, e manera general pa prevení Zika ta di **evitá di kria sangura i no laga sangura pikabo.**

Una bes tin hende malu ku e malesa di Zika den kas, ta importante pa **NO** laga sangura pika ni esun malu i tampoko esun ku ainda no a bira malu. Ora un sangura pika un hende malu e sangura ta keda infektá ku e vírùs. E sangura infektá ei ta sigui plama e malesa di Zika pa mas hende den kas i besindario.



HENDE MUHÉ NA ESTADO

Pa motibu di e posibel riesgonan relashoná ku infekshon di Zika durante embaraso pa ku e yu ku ainda no a nase, ta pidi pa hende muhé na estado sigui e rekomendashonnan di protekshon.

- Mester hasi tur posibel pa sangura no pikabo.
- Komo ku a identifiká kasonan di transmishon di e vírùs di Zika posiblemente via relashon seksual ta rekomendá uso di kondon ora tene relashon; ta importante pa hasi esaki te ora e yu nase. E rekomendashon aki ta konta den tur kaso, no opstante e hòMBER a bira malu di Zika òf no; esaki ta debí na e echo ku 4 di kada 5 hende ku infektá ku Zika no ta haña síntoma. Kemen bo por tin Zika i pega e hende muhé na estado sin sa.

Si bo haña iritashon di kueru (rash/uitslag), wowo kòrá òf doló di skarnir ku òf sin keintura, akudí na bo dòkter di kas i splika tur lokual bo ta sinti i si ta nesesario pon'é na altura ku bo ta na estado.

Pa mas informashon

KEDA NA ALTURA!



LIKE NOS RIBA FACEBOOK



GMN TV / MINISTRY OF HEALTH CURAÇAO

Pa mas informashon: 0800-0888 (grátis) i 9345



MINISTERIO DI
SALUBRIDAT, MEDIO AMBIENTE
I NATURELESA

SEKTOR DI SALÚ
SALUBRIDAT PÚBLIKO UO G&Gz
PISCADERWEG # 49
TELEFÓN (+5999) 462 2040

www.gobiernu.cw



Ministerio di
Salubridat, Medio Ambiente i Naturalesa

FOYETO DI INFORMASHON

ZIKA

KÒRSOU, HUNTU NOS TA KOMBATÍ SANGURA!
Ayó Dengue, ayó Chikungunya, ayó Zika!